

神農本草經疏卷之十七

獸部中品

總十七種今疏其要者九種

白馬莖

尿溺附

鹿茸

角髓腎肉附

牛角觶

膽肉附

殺羊角

肝腎肉血附

狗陰莖

頭骨血附

附

羚羊角

犀角

虎骨

兔頭骨

腦肝肉附

白馬莖味鹹甘平無毒主傷中脉絕陰不起強

志益氣長肌肉肥健生子小兒驚癇陰乾百日
用

疏○馬火畜也其陰莖又純陽之物也故能
主男子陰痿堅強房中藥多用之本經味鹹
氣平別錄甘無毒察其功用氣平應作溫非
甘溫則不主傷中脉絕以甘能補血脉溫能
通經絡故耳陽衰則陰不起而生長之道絕
鹹溫走下焦補助真陽則陰自起精自煖故

能令人有子也氣屬陽陽得補故能益氣腎
藏志腎氣足故能強志甘溫補血脈而助真
氣故又能長肌肉肥健也別錄又主小兒驚
癇者似非其所長應是誤入耳凡收當取銀
色無病白馬春月游牝時力勢正強者生取
陰乾百日用時以銅刀切片將生羊血拌蒸
半日去血曬乾剉用

主治參互

得肉蓯蓉巴戟天山茱萸兔絲子真陽起石
人參鹿茸狗陰莖作丸治真陽虛脫陰痿不
起下元冷憊等證

簡誤

馬陰莖乃純陽之物也凡陰虛火盛者不得
服人但喜其溫煖資助陽道少年多慾者房
中術用之仗其力勢恣欲無節以致損竭真
陰多成勞瘵不可不戒也

○馬通微溫主婦人崩中止渴及吐下血鼻衄
金瘡止血

疏○白馬通本經雖云微溫然必是苦而涼
者也惟其苦涼所以能療諸血熱證止渴及
孟詵主陰陽易垂死者絞汁服也

○白馬溺味辛微寒主消渴破癥堅積聚男子
伏梁積疝婦人瘕疾銅器盛飲之

疏○白馬溺昔有人與其奴皆患心腹痛病

奴死剖之得一白鼈赤眼仍活以諸藥納口中終不死有人乘白馬觀之馬尿墮鼈而鼈縮遂以灌之卽化成水其人乃服之疾亦愈觀其氣味不應有如是之功乃知物性畏忌各有所制如刀柄之刈三稜而化爲水正以遇其所制之物故也本經云氣微寒然詳其用必是微溫味應帶鹹辛鹹溫具足所以能療經所言諸證

主治叅互

千金方食髮成癰咽中如有蟲上下者白馬
尿飲之佳 鮑氏方利骨取牙白馬尿浸茄
稗三日炒爲末點牙卽落

簡誤

無積聚癰疽者不得服胸中虛痞誤作伏梁
服之有損

鹿茸味甘酸溫微溫無毒主漏下惡血寒熱驚

癰益氣強志生齒不老療虛勞洒洒如瘧羸瘦

四肢酸疼腰脊痛小便利洩精溺血破留血在

腹散石淋癰腫骨中熱疽瘰

瘰應作瘍○凡用取形如分岐馬鞍

茸端如瑪瑙紅玉破乏肌如朽木者最良先以酥薄塗勻於烈灸中燎去毛再灸

疏○鹿茸稟純陽之質含生發之氣故其味

甘氣溫別錄言酸微溫氣薄味厚陰中之陽

也入手厥陰少陰足少陰厥陰經婦人衝任

脉虛則爲漏下惡血或瘀血在腹或爲石淋

男子肝腎不足則爲寒熱驚癇或虛勞酒酒
如癰或羸瘦四肢酸疼腰脊痛或小便數利
洩精溺血此藥走命門心包絡及腎肝之陰
分補下元真陽故能主如上諸證及益氣強
志生齒不老也癰腫疽瘍皆榮氣不從所致
甘溫能通血脉和腠理故亦主之曰華子主
補男子腰腎虛冷脚膝無力夜夢鬼交精溢
自出女人崩中漏血赤白帶下炙木空心酒

服方寸匕

主治參互

同牛膝杜仲地黃山茱萸補骨脂巴戟天山
藥肉蓯蓉兔絲子治腎虛腰痛及陰痿不起
澹寮方班龍丸治諸虛用鹿茸酥炙麋角
膠炒成珠鹿角霜陽起石煨紅醋拌肉蓯蓉
酒浸酸棗仁柏子仁黃耆各一兩地黃丸蒸
八錢朱砂半錢各爲末酒糊丸梧子大每空

心酒下五十丸昔西蜀市中有一道人貨之
一名茸珠丹每醉高歌曰尾閭不禁滄海竭
九轉靈丹都漫說惟有班龍頂上珠能補玉
堂關下穴朝野遍傳之卽此方也 晉濟方
鹿茸酒治陽事虛痿小便頻數面色無光用
嫩鹿茸一兩去毛切片山藥末一兩絹袋裹
置酒甕中七日後開甕日飲三盃將茸焙乾
作丸服 本事方陰虛腰痛不能反側鹿茸

兔絲子各一兩茴香半兩爲末以羊腎二對
和酒煮爛搗如泥和丸梧子大陰乾每服三
五十丸酒下日三服 濟生方室女白帶因

衝任虛寒者鹿茸酒蒸焙二兩金毛狗脊白
歛各一兩爲末用艾煎醋打米糊丸梧子大
每酒下五十丸日二服 簡誤同白膠

○鹿角味鹹無毒主惡瘡癰腫逐邪惡氣留血
在陰中除小腹血急痛腰脊痛折傷惡血益

氣杜仲爲之使

疏○鹿山獸屬陽夏至解角者陰生陽退之
象也麋澤獸屬陰冬至解角者陽生陰退之
象也是以麋茸補陰鹿茸補陽角亦如之凡
角初生軟嫩者爲茸稟壯健之性故能峻補
腎家真陽之氣熬成白膠則氣味甘緩能通
周身之血脉生角則味鹹氣溫惟散熱行血
消腫辟惡氣而已鹹能入血軟堅溫能通行

散邪故主惡瘡癰腫逐邪惡氣及留血在陰
中少腹血急痛折傷惡血等證也肝腎虛則
爲腰脊痛鹹溫入腎補肝故主腰脊痛氣屬
陽補陽故又能益氣也日華子云水磨服治
脫精尿血夜夢鬼交醋磨汁塗瘡瘍癰腫熱
毒火灸熱熨小兒重舌鵝口瘡孟詵云蜜炙
研末酒服輕身強骨髓補陽道絕傷又治婦
人夢與鬼交者酒服一撮卽出鬼精燒灰治

女子胞中餘血不盡欲死者悉取其入血行
血散熱消腫補陽辟邪之意也

主治參互

濟生方骨虛勞極面腫垢黑脊痛不能久立
血氣衰憊髮落齒槁甚則喜唾用鹿角屑二
兩牛膝一兩半爲末煉蜜丸梧子大每服五
十丸空心鹽湯下 肘後方腎虛腰痛如錐
刺不能動搖鹿角屑三兩炒黃研末空心溫

酒服方寸七日三子母秘錄產後腹痛瘀
血不盡者鹿角燒研豉汁服方寸七日三并
治產後血暈千金方蹉跌損傷血瘀骨痛
鹿角末酒服方寸七瀕湖方癰癤腫痛毒
鹿角尖磨濃汁塗之

簡誤

無瘀血停畱者不得服陽盛陰虛者忌之胃

火齒痛亦不宜服